

**Uunga siunnersuut: Sukisaarsaatigalugu aalisartunik aalisartitsinermut
akuersissuteqartarneq pillugu Inatsisartut inatsisaat nr. xx, yy 2012-meersoq**

Kapitali 1.

Atuuffia

§ 1. Sukisaarsaatigalugu eqalunnik (*Salvelinus alpinus*) aalisarnissaq siunertaralugu Kalaallit Nunaanni kuummut aalajangersimasumut imaluunniit imartamut annertunerusumik killilerneqartumut akuersissuteqartarneq inatsimmi killilorsorneqarpoq.

Imm. 2. Danskit naalagaaffianni innuttaasunut Kalaallit Nunaanni aalajangersimasumik najugaqanngitsunut aamma nunat allat naalagaaffiini innuttaasunut ukiut siuliini marlunni Kalaallit Nunaanni aalajangersimasumik najugaqarsimanngitsunut akiliisitsilluni aalisarsinnaanermik akuersissummiq pigisaqartoq kisermaassilluni neqerooruteqarsinnaavoq.

Kapitali 2.

Sukisaarsaatigalugu aalisartitsinermut akuersissut

§ 2. Inuit danskit naalagaaffianni innuttaasut Kalaallillu Nunaanni aalajangersimasumik najugaqanngitsut aalisarsinnaanermut akuersissummiq nunami namminermi atuutummik pissarsisimagaluarunilluunniit kuummi imaluunniit imartami killilikkami akuersissuteqarfiusumi nalinginnaasumik aalisarsinnaassanngillat.

Imm. 2. Aammattaaq inuit nunat allat naalagaaffiini innuttaasut ukiut siuliini marlunni Kalaallit Nunaanni aalajangersimasumik najugaqarsimanngitsut aalisarsinnaanermut akuersissummiq nunami namminermi atuutummik pissarsisimagaluarunilluunniit kuummi imaluunniit imartami killilikkami akuersissuteqarfiusumi nalinginnaasumik aalisarsinnaassanngillat.

Imm. 3. Danskit naalagaaffianni innuuttaasut Kalaallit Nunaanni aalajangersimasumik najugaqartut aamma nunat allat naalagaaffiini Danmarkimiunngitsoq innuttaasut Kalaallit Nunaanni aalajangersimasumik najugaqartut ukiunilu marlunni tulleriinni najugaqarsimasut sumiiffinni akuersissuteqarfiusuni suli aalisarsinnaapput.

§ 3. Kuummi imaluunniit imartami killilikkami sukisaarsaatigalugu aalisartunik aalisartitsisinnaanermut akuersissut Naalakkersuisunit tunniunneqartarpoq. Akuersissut sumiiffimmut aaliangersimasumik killikkamut akuersissutaassaaq. Sumiiffik akuersissuteqarfiusoq nunap assinnganik ilangussilluni bilagitut tunniunneqassaaq.

Kapitali 3.

Akuersissummik pigisaqarnermut piumasaqaatit

§ 4. Akuersissummut piumasaqaatit annertunerusut Naalakkersuisut akuersissummillu pigisaqartoq akornanni akuersissut pillugu isumaqatigiissutaanni nalunaarutigineqassapput.

§ 5. Sumiiffiup eqqiluitsuutinnissaanik sukujoqannginnissaanillu akuersissummik pigisaqartoq pisussaaffeqarpoq.

§ 6. Sumiiffimmi akuersissuteqarfiusumi aalisarneq pillugu naatsorsueqqissaarusiornissamut akuersissummik pigisaqartoq pisussaaffeqarpoq. Sumiiffimmi ullormut qanoq amerlatigisut sukisaarsaatigalugu aalisarnersut skemanngorlugu nalunaarutigineqassaaq.

Imm. 2. Paasissutissat ukiut tamaasa kingusinnerpaamik ulloq 1. oktober Naalakkersuisunut nassiunneqartassapput.

§ 7. Kuunni imartanilu akuersissuteqarfiusuni akiliilluni sukisaarsaatigalugu aalisarnermi taamaallaat qissattaatit atorneqassapput.

§ 8. Aalisarnerup qanoq ingerlanneqarnissaa pillugu akuersissuteqarneq pillugu isumaqatigiissummi annertunerusunik aalajangersaasoqarsinnaavoq, tassunga ilanngulligit aalisarnermi atortut atorneqarsinnaasut aamma aalisakkat pisarineqartut ilaannik avalatsiteqqiinissamik pisussaaffeqarsinnaaneq.

§ 9. Akuersissummik pigisaqartoq sumiiffimmi akuersissuteqarfiusumi aalisarsinnaanermut akuersissummik sukisaarsaatigalugu aalisartunut ataasiakkaanut tunniussissaaq. Aalisarsinnaanermut akuersissutit piffissani aalisarfiusinnaasuni tamani immikkut tulleriinnillu normulersorneqassapput. Aalisarsinnaanermut akuersissutit periutsit Naalakkersuisunit suliarineqartut malillugit suliarineqassapput.

Imm. 2. Sukisaarsaatigalugu aalisartoq sumiiffimmi akuersissuteqarfiusumi aalisarsinnaasoq sumiiffimmi aalisarnermi aalisarsinnaanermut akuersissummik tigummisaqassaaq, taannalu piumasaqaateqartoqarnerani Kalaallit Nunaanni Aalisarsinnaanermut Akuersissutinik Nakkutilliisoqarfiup aallartitaanut takutinneqartassaaq.

Kapitali 4.

Kuunnik akuersissuteqarfiusunik toqqaaneq

§ 10. Kommunimi kuunnik eqaloqarfinnik atuinissamut soqtigisaqarnerup paasisaqarfiginissaa siunertalarugu kommuni sumiiffimmi tusarniaassaaq.

Imm. 2. Imm. 1 malillugu tusarniaanermi akissutinik eqikkaaneq kommunimit suliarineqassaaq Naalakkersuisunullu nassiunneqarluni.

§ 11. Atuinissamik soqutigisaqarnerit pillugit tusarniaareernerup kingorna kuuit imartallu sorliit akuersissuteqarfingineqarnissaannik kommunip inassuteqaataa kommunip Naalakkersuisunut nassiuressavaa.

Imm. 2. Sumiiffit illoqarfinnut nunaqarfinnullu illuaraqarfinnulluunniit qanittumiinngitsut sumiiffinnilu innuttaasunit aalisarfittut atorneqarpiarneq ajortut kommunit sapinngisamik inassuteqaateqarfingissavaat.

Imm. 3. Kuuit imartalluunniit sorliit akuersissuteqarfiusaat pillugu Naalakkersuisut aalajangiissapput.

§ 12. Sumiiffinni akuersissuteqarfiusuni sukisaarsaatigalugu aalisartut qanoq amerlatigisut nungusaataanngitsumik ullormut aalisartinneqarsinnaanerannik aammalu sukisaarsaatigalugu aalisartut ataasiakkaat avalatsitseqqiinani ullormut qassnik pisaqarsinnaanerannik nalilersuineq inassuteqaat ilanggullugu kommunit suliariressavaat.

§ 13. Kalaallit Nunaanni sumiiffit akuersissuteqarfiusut katillugit amerlassusaat piffissami sumiluunniit 20-t sinnissanngilaat.

§ 14. Akuersissuteqarneq pillugu erseqqarissumik assigjiaartumillu paasissutissiilluni kommuni sumiiffimmi akuersissuteqarfiusumi allagartaliissaq.

Kapitali 5.

Akuersissummik tunniussineq

§ 15. Inummut innuttaasunik nalunaarsuiffimmi Kalaallit Nunaanni najugaqartutut nalunaarsorneqarsimasumut aammalu ukiuni siuliini tulleriinni marlunni inuttaasunik nalunaarsuiffimmi Kalaallit Nunaanni najugaqartutut nalunaarsorneqarsimasumut aammalu Kalaallit Nunaanni tamakkiisumik akileraartussaatitaasumut akuersissut tunniunneqarsinnaavoq.

Imm. 2. Aammattaaq Oanpartsselskabimut, aktieselskabimut interessentselskabimulluunniit Kalaallit Nunaanni angerlarsimaffeqartumut akuersissut tunniunneqarsinnaavoq.

Imm. 3. Anpartsselskabimut aktieselskabimulluunniit akuersissummik tunniussissagaanni suliffeqarfimmi piginneqataassutit 2/3-ii sinnerlugit inunnit imm. 1-imik piumasaqaatinik eqqortitsisunit pigineqassapput. Anpartsselskabimi aktieselskabimiluunniit 2/3-it sinnerlugit taasisinnaatitaaneq suliffeqarfimmi piginneqataassunik 2/3-ii sinnerlugit pigisaqarnermut naligiisinneqassaaq.

Imm. 4. Interessentselskabimut akuersissummik tunniussissagaanni piginneqataasut tamarmik ukiuni siuliini marlunni tulleriinni innuttaasunik nalunaarsuiffimmi Kalaallit Nunaanni najugaqartutut nalunaarsorneqarsimassapput Kalaallillu Nunaanni tamakkiisumik akileraartussaatitaassallutik.

§ 16. Sumiiffit sorliit akuersissummik qinnuteqaateqarfiusinnaanerat pillugu paasissutissiilluni aviisini nuna tamakkerlugu saqqummersartuni sivikinnerpaamik sapaatit

akunnerinik arfinilinnik siumut nalunaaruteqarluni Naalakkersuisut tamanut nalunaaruteqassapput. Inuit suliffeqarfillaunniit akuersisummik pissarsinissamik soqtigisaqartut qinnuteqaammik Naalakkersuisunut nassiussinissamik kaammattorneqassapput.

§ 17. Akuersisummik tunineqarnissaq pillugu qinnuteqaat Naalakkersuisunut nassiunneqassaaq, taakkulu akuersisummik tunniussinissaq pillugu aalajangiissapput.

Imm. 2. Akuersisummik atuinissami sulinummik allaaserinninneq akuersisummik tunineqarnissaq pillugu qinnuteqaammut ilangunneqassaaq.

Imm. 3. Sukisaarsaatigalugu aalisartunik aalisartitsinssamut akuersisummik qinnuteqartut piukkunnaateqarnerat pillugu Naalakkersuisut Nunatsinni Takornariaqarnermut Inuussutissarsiornermullu Siunnersuisoqatigiinnut tusarniaassapput.

Imm. 4. Qinnuteqartup piukkunnaateqarneranik nalilersuinermut atugassatut suliffeqarfip imaluunniit suliffeqarfip inummit ingerlanneqartup naatsorsuutaanik Naalakkersuisut qinnuteqarsinnaapput.

§ 18. Qinnuteqartumik ataatsimut nalilersuineq tunngavigalugu akuersisummik tunniussinissamik aalajangiisoqassaaq, tassani ilaatigut pissutsit uku pingartinneqassallutik:

- 1) Takornarissanik sukisaarsaatigalugu aalisartunik aalisartitsisarnermik qinnuteqartup misilittagaqarnera.

- 2) Sukisaarsaatigalugu aalisarnermik aaqqissuussinikkut qinnuteqartup siusinnerusukkut aningaasanik kaaviiartitaqartitsilernasimanera.

- 3) Qinnuteqartup takornariartsitsilluni inuussutissarsiuteqarnermi nalinginnaasumik misilittagai.

- 4) Qinnuteqartup sumiiffimmut atassuteqarnera.

§ 19. Qinnuteqartut kikkulluunniit akuersisummik tunineqarnissamut piukkunnaateqanngitsutut nalilerneqarpata akuersisummik tunniussinnginnissaq Naalakkersuisut toqqarsinnaavaat.

§ 20. Akuersissut ukiuni qulini atuuttussatut tunniunneqassaaq. Nalilerneqarpat siusinnerusukkut akuersissut naammaginartumik ingerlanneqarsimasoq ukiuni qulini atuuteqqittussatut akuersissut sivitsorneqarsinnaavoq.

§ 21. Inummut ataatsimut suliffeqarfimmulluunniit ataatsimut akuersissutit marlunnit amerlanerusut tunniunneqarsinnaanngillat.

Imm. 2. Suliffeqarfifit inunnit akuersissutinik marlunnik pigisaqareersunit 50 %-ii sinnerlugit piginnejataassuteqarfingineqartut akuersissutinik tunineqarsinnaanngillat.

Imm. 3. Inuk suliffeqarfillaunniit aktieselskabimi imaluunniit anpartsselskabimi taasisinnaatitaanernik 50 %-it sinnerlugit pigisaqarpat imalunniit inuk suliffeqarfillaunniit suliffeqarfimmi aktianik anpartinilluunniit amerlanerussuteqartunik pigisaqarpat, tamanna akuersisummik pigisaqarnermut naligiisinneqassaaq.

Kapitali 6.

Akiliineq

§ 22. Sukisaarsaatigalugu aalisartoq sumiiffimmi akuersissuteqarfiusumi ullormi ataatsimi aalisarnermut aalajangersimasumik akiliisassaaq. Inuup ataatsip ullormut ataatsimut akiliutissaa 150,00 kr.-inut aalajangerneqarpoq.

Imm. 2. Akuersissummik pigisaqartup akiliutaa Nunap Karsiata pissavaa.

Imm. 3. Akiliut ukiumut ataasiarluni akilerneqartassaaq ukiullu tamaasa ulloq 1. oktober akiligassangortassalluni. Ulloq piffissaq eqqorlugu akiliiffissaq kingusinnerpaaq tassaavoq akiliutissap akilerneqartussanngornerata kingorna 1. december aallaqqataa tulliuttoq.

Kapitali 7.

Akuersissutip atorunnaarnera tunniunneqarneralu

§ 23. Akuersissut ukiumut aalisarfiusinnaasuni tulleriinni sisamani piffissami aalisarfiusumi ataatsimi taamaallaat inunnit arfinilinnit ikinnerusunit atorneqarpat imaluunniit ukiumut aalisarfiusinnaasumi inuit arfinillit amerlaqataat akiliippata akuersissut atorunnaassaaq.

§ 24. Piffissap akuersissuteqarfiusup atorunnaarnerani akuersissuteqartoq sumiiffimmi saliisussaatitaavoq. Sumiiffiup akuersissuteqarfiusup salinneqareerluni qimanneqarsimanera kommunip misissussavaa.

§ 25. Akuersissumut akiliutissaq akilerneqanngippat, takuuk § 22, imm. 1, imaluunniit akuersissummik nalunaaruteqarnermi piumasaqaatit allatigut annertuumik sumiginnarneqarpata akuersissut Naalakkersuisut utertissinnaavaat.

§ 26. Akuersissutnik tunniussinerit tamarmik Naalakkersuisunit akuerineqassapput. Akuersissut akiligassaqarfinnit akiliutigitinniarneqarsinnaanngilaq akuersissullu qularnaveeqqutit tunniunneqarsinnaanani.

Imm. 2. Akuersissut aktieselskabimit imaluunniit anpartsselskabimit pigineqarpat suliffeqarfimmi piginneqataassutsit 50 %-ii sinnerlugit tunniunneqarpata akuersissummik tunniussinertut isagineqassaaq.

Imm. 3. Inuk suliffeqarfilluunniit taasisinnaassustit 50 %-ii sinnerlugit pigisaqalerpat imaluunnit inuk suliffeqarfilluunniit suliffeqarfimmi aktianik anpartinilluunniit amerlanerussuteqartunik pigisaqalerpat, tamanna tunniussinertut isagineqassaaq.

Imm. 4. Suliffeqarfik akuersissummik pigisaqartoq suliffeqarfimmi pineqartumi piginnittuunnermi piisutsit allannguutai tamaasa pillugit Naalakkersuisunut nalunaaruteqartussaatitaavoq.

Imm. 5. Interessentselskabimi piginneqataasut allanngornerat Naalakkersuisunit akuerineqassaaq.

Imm. 6. Akuersissut kingornunneqarsinnaanngilaq.

Kapitali 8.
Pineqaatissiissutit

§ 27. Inuit danskit naalagaaffianni innuttaasut Kalaallit Nunaanni aalajangersimasumik najugaqanngitsut imaluunniit nunani allani naalagaaffinni inuttaasut ukiut siuliini marlunni Kalaallit Nunaanni aalajangersimasumik najugaqarnikuunngitsut akuersisummik piginnittumit akuerineqaratik kuummi imartamiluunniit akuersissuteqarfiusumi aalisartut akiisitsilluni pineqaatissinneqarsinnaapput.

Imm. 2. Imm. 1 malillugu pineqaatissiilluni akiliutit Nunap Karsiata pissavai.

§ 28. Akuersisummik pigisaqartoq piffissap akuersissuteqarfiusup atorunnaarnerata kingorna sumiiffimmi akuersissuteqarfiusumi saliinngippat, akuersisummik pigisaqarsimasup akiligassaanik saliititsisoqarsinnaavoq.

Kapitali 9.
Atuutilernera

§ 29. Inatsit 1. januar 2012-imi atuutilerpoq.

Namminersorlutik Oqartussat, ulloq xx, yy 2011

Kuupik Kleist